

TARIKH : 17 JULAI 2020  
AKHBAR : BERITA HARIAN  
MUKA SURAT : M/ S 4

## FELDA runding terbit sukuk

**Kuala Lumpur:** FELDA sedang berunding dengan Kementerian Kewangan bagi penerbitan sukuk berjaminan kerajaan untuk melaksanakan penstrukturan semula pinjaman agensi itu.

Menteri di Jabatan Perdana Menteri (JPM), Datuk Seri Mustapa Mohamed, berkata ia antara usaha yang giat dilaksanakan di bawah Pelan Pemulihan FELDA menerusi Kertas Putih FELDA.

"Kertas Putih FELDA yang dibentang di Dewan Rakyat pada 10 April tahun lalu menggariskan pelbagai strategi untuk dilaksanakan dalam tempoh jangka pendek, sederhana dan panjang.

"Antara strategi utama yang sudah dan sedang dilaksanakan adalah menambah baik tadbir urus korporat, menangani masalah aliran tunai, merasionisasi pelaburan dan kepentingan, memperkasa peneroka, mengukuhkan sistem perakaunan dan meningkatkan pembabitian dalam aktiviti hiliran.

"Secara keseluruhan, semua strategi yang dirancang di bawah Pelan Pemulihan FELDA sudah dan sedang giat dilaksanakan," katanya menjawab soalan Datuk Jalaluddin Alias (BN-Jelebu) pada persidangan Dewan Rakyat, semalam.

Mustapa berkata, pelaksanaan semua strategi itu disokong me-

lalui peruntukan kewangan termasuk pemberian jaminan kerajaan berjumlah RM6.23 bilion dalam tempoh empat tahun.

Katanya, peruntukan itu terdiri daripada Program Pembangunan Peneroka bagi mendapatkan hasil baharu berjumlah RM1 bilion dan penyiapan projek terbengkalai Perumahan Generasi Baharu FELDA (PGBF) berjumlah RM250 juta.

Selain itu, beliau menjelaskan, penghapusan faedah hu-

tang kebun peneroka berjumlah RM2 bilion, pemberian pinjaman sara hidup dan pendahuluan hasil kepada peneroka berjumlah RM480 juta dan pemberian jaminan atas penstrukturan semula pinjaman FELDA berjumlah RM2.5 bilion.

"Bagi penghapusan faedah hutang kebun peneroka, FELDA memuktamadkan lebih 20,088 daripada 77,974 penyata hutang peneroka yang terbabit dengan program tanam semula. Proses

memuktamadkan penyata hutang peneroka ini dijangka diselesaikan pada September 2020.

"Kerajaan juga menubuhkan pasukan khas yang dipengerusikan oleh Tan Sri Abdul Wahid Omar, bagi mencari kaedah terbaik memastikan kemandirian dan keamanan kewangan FELDA untuk manfaat warga peneroka.

"Pasukan khas itu dijangka membentangkan hasil laporan pada bulan depan," katanya.

